

**Pisortat ingerlatsinerat pillugu paasitinneqarsinnaatitaaneq pillugu
Inatsisartut inatsisaata allanngortinneqarneranik
Inatsisartut inatsisissaattut siunnersuut
(Sulisorineqartut pillugit paasissutissanik paasitinneqarsinnaaneq)
pillugu**

**Inatsisartut Inatsisit Atortinneqarnerannut Ataatsimiititaliaannit
ISUMALIUTISSIISSUT**

Suliamik suliarinninnermi Inatsisartut Inatsisit Atortinneqarnerannut Ataatsimiititaliaannit peqataapput

inatsisartuni ilaasortaq Anders Andreassen (S), siulittaasoq
inatsisartuni ilaasortaq Hans Enoksen (S)
inatsisartuni ilaasortaq Olga Poulsen (IA), siulittaasup tullia
inatsisartuni ilaasortaq Otto Steenholdt (A)
inatsisartuni ilaasortaq Anthon Frederiksen (K)

Inatsisartut inatsisissatut siunnersuummik siullermeeralutik suliarinninnerata kingorna Inatsisartut Inatsisit Atortinneqarnerannut Ataatsimiititaliaata siunnersuut oqaaseqaatitai ilanngullugit misissuataarsimavaa.

Inatsisissatut siunnersuummik suliaqarnerminut atasumik Inatsisit Atortinneqarnerannut Ataatsimiititaliartaaq tusarniaanermi akissutigineqartut nuutinneqarnerinik pissarsisimavoq. Inatsisit Atortinneqarnerannut Ataatsimiititaliap tamatumunnga atasumik ajuusaarutigalugu paasivaa inatsisissatut siunnersuutip oqaasertaliivigineqarneratigut ilisimatitsissutigineqarsimanngitsoq inatsisissatut siunnersuutip saqqummiunneqarnissaa sioqqullugu pisortat kattuffillu sorliit tusarniaavigineqarsimanersut.

Tamatuma kingorna ataatsimiititaliaq imatut inassuteqassaaq:

Ataatsimiititaliami amerlanerussuteqartut, tassa, Anders Andreassen (S), Hans Enoksen (S), Otto Steenholdt (A) aamma Olga Poulsen (IA) inatsisissatut siunnersuummik, ilusiligaanera naapertorlugu, akuersissutiginnittut, ataatsimiititaliamilli inassutigineqartoq kalaallisuuani §2, imm. 2, oqaaseqatigiinni siullermi, naqinnerliugaq Naalakkersuisunit, siunnersuutip pingajussaa-neerlugu suliarineqannginnerani, iluarsitinneqassasoq.

Ataatsimiititaliami amerlanerussuteqartut iluarisimaarlugu oqaatigaat inatsisissatut siunnersuutikkut atorfilik illersorneqartoq, inuullu inuttut ataqqineqarnissaa innimigineqartoq, siunnersuutikullu anguniagaasut isumaqatigitik unnerlutik.


Ataatsimiititalialli isumaqatigiittup ajuusaarutigaa sulisorisat kattuffiisa tusarniaavigineqarsimannginnerat, Naalakkersuisunillu piffissaq tusarniaanermut akissuteqarfissanngortitaq sivikitsuusoq pissutigalugu kommunalbestyrelsit siunnersuummut isummernissaannut periarfissiisoqarsimanngitsoq, allaammi kommunit tamakkerlutik allaffeqarfikkoortumik isummerfiginninnissamut periarfissinneqarsimanngitsut. Immikkut ajuusaarutigisarialittut ataatsimiititaliap isumaqarfigaa KANUKOKA 1998-imi ukiakkut Naalakkersuisunut KANUKOKA-mut tunngatillugu tusarniaasernerit piffissaq sivikitsuarsuaq atorlugu pisarnerat pissutigalugu ajornartorsiuteqartoqartarneranik erseqqissaasimammat, taamanikkullu tassunga tunngasumik Naalakkersuisut siulittaasuata neriorsuutigigaa siunissami tusarniaasoqartillugu tusarniaanermut atortussat piffissaqartitsilluarluni nassiunneqartassasut.

Inatsisissatulli siunnersuutip pisariusorsuunnginnera pissutigalugu *ataatsimiititaliami amerlanerussuteqartut* pissutissaqartinnngilaat Inatsisartunut inassutigissallugu aappassaaneerlugu pingajussaaaneerlugulu suliarinninnerup, tusarniaasoqaqqinnissaa siunertaralugu, Inatsisartut ukiakkut ataatsimiinnissaannut kinguartinneqaqqinnissaa.


Ataatsimiititaliami ikinnerussuteqartup, tassaasup Anthon Frederiksenip, ataatsimiititaliami amerlanerussuteqartut assigalugit akueraa inatsisissatut siunnersuutip anguniagaasa pingaartinneqarnissaat, eqqarsarnartoqartilluguli danskit periusaat malillugit Kalaallit Nunaanni inatsisiliortoqartarnissaa, tassa pisortat kattuffiillu tusarniaavigeqqaarnagit inatsisiliornerup pissusissamisoortuunerata qulakkeerniarneqarnissaa. Taamaammat ikinnerussuteqartup ernummatigalugu maluginiarpaa tusarniaamissamut naammattumik piffissaliinnginnikkut kommunit siunnersuummut oqaaseqarfiginnissinnaanerit mattunneqarmat. Ikinnerussuteqartutaaq eqqarsarnartoqartippaa sulisorisat kattuffiisa, minnerunngitsumik inatsisissatut siunnersuummi § 2, imm. 3, oqaaseqatigiit aappaanni, nutaamik oqaasertaliivigineqartoq naapertorlugu, pineqartut (atorfillit pisortatut atorfeqartut), sulisorisat kattuffii tusarniaavigineqarsimanngimmata, massa tassunga tunngasumik maannakkut periuserineqartumut sanilliullugu mianersoqqussutit iliuserisallu taakkunangga sakkortunerusut pillugit paasitinneqarsinnaanerup annertusineqarnissaanik

kinguneqarsinnaasoq. Tamanna tunuliaqutaralugu ikinnerussuteqartup Inatsisartunut inassuteqaa-
tigaa inatsisissatut siunnersuutip aappassaaneerlugu pingajussaaneerlugulu suliarineqarnissaa
Inatsisartut ukiakkut ataatsimiinnissaannut kinguartinneqassasoq, taamaaliornikkut pisortat
kattuffiillu, inatsisiliorniarnermik suliaqarnermi Naalackersuisunit peqataatinneqarsimanngitsut,
tusarniaavigineqarnissaat ingerlanneqarsinnaaqullugu.

Ataatsimiittaliap siulittaasua
Anders Andreassen (Siumut)


Olga Poulsen (IA)


Hans Enoksen (Siumut)


Anthon Frederiksen (K)


Otto Steenholdt (Atassut)